

20 OCT 1999

Mahathir-Indonesia

MALAYSIA HORMATI PILIHAN RAKYAT INDONESIA, KATA DR MAHATHIR

KUALA LUMPUR, 20 Okt (Bernama) -- Datuk Seri Dr Mahathir Mohamad berkata pemilihan Abdurrahman Wahid sebagai presiden keempat Indonesia adalah dengan kehendak rakyat negara itu dan Malaysia menghormatinya.

"Kami berharap presiden itu akan menerima sokongan sewajarnya untuk memudahkan pentadbiran kerajaannya," kata Perdana Menteri kepada pemberita di sini.

Beliau sebelum itu mengunjungi Presiden Venezuela Hugo Rafael Chavez Frias untuk mengucapkan selamat pulang.

Dalam pemilihan di Majlis Permesyuaratan Rakyat (MPR) hari ini, Abdurrahman, 59, atau lebih dikenali Gus Dur mendapat 373 undi untuk menewaskan Megawati Sukarnoputri yang mendapat 313 undi.

Menteri Luar Datuk Seri Syed Hamid Albar pula mengucapkan tahniah kepada presiden baru itu dan menyifatkan pemilihan itu sebagai benar-benar bebas dan demokratik.

"Saya berpendapat kita harus menghormati keputusannya," katanya.

Syed Hamid berkata Malaysia berharap hubungan dengan Indonesia menjadi bertambah kukuh.

"Kita harap keadaan akan kembali seperti biasa supaya mereka boleh menumpukan kepada usaha memulihkan negara itu," katanya.

-- BERNAMA

MAM MAI